

Á Mesa do Parlamento

O Grupo Parlamentar da Alternativa Galega de Esquerda, a iniciativa dos seus deputados **Ramón Vázquez Díaz** e **Xabier Ron Fernández**, a través da súa voceira **Yolanda Díaz Pérez**, e ao abeiro do disposto no artigo 160 do Regulamento da Cámara, presenta a seguinte **Proposición non de lei, para o seu debate en Pleno**, relativa á creación dunha comisión de estudo para o diagnóstico da situación da Lingua Galega e o deseño de liñas de actuación para compensar a caída de falantes e ámbitos de uso.

Exposición de motivos

Os datos que se van coñecendo dende diferentes ámbitos oficiais confirman, de xeito evidente, un importante e alarmante descenso no número de falantes e dos ámbitos de uso da Lingua Galega.

O Instituto Galego de Estatística (IGE) fixo públicos unha serie de datos sobre **Coñecemento e o uso do galego** referidos ao ano 2013. A situación que reflicten eses datos falan dunha Galicia que está convertendo a súa lingua propia nun obxecto etnográfico: é coñecida, pero cada vez emprégase menos.

Na franxa de idade máis temperá, entre os 5 e os 14 anos, a franxa das persoas que usan de forma habitual o galego, ou máis galego que castelán, acada uns rexistros do 25,12% fronte ao 74,88% que fala de forma habitual castelán ou fai máis uso do castelán. Se agrupamos os rexistros da franxa que vai entre os 5 e os 29 anos, no tocante a monolingües en galego o rexistro ofrécenos unha ridícula e pouco esperanzadora porcentaxe do 16,49%, mentres que o de monolingües en castelán móvese no 40,36%.

Estes simples datos, sen ir máis lonxe, amosan que as franxas de idades inferiores non van ser quen de garantir o relevo interxeracional no uso do galego, xa que, quen non ve utilidade no uso da Lingua Galega dificilmente pode actuar como panca dinamizadora do seu uso.

Nunha declaración institucional realizada o pasado 31 de xaneiro a Academia Galega afirmaba na súa introdución que os *“datos estatísticos recentemente publicados veñen a apuntar un preocupante retroceso do uso do Galego nos últimos anos, especialmente entre as novas xeracións, agravando unha tendencia histórica que pode conducilo á decadencia”*.

O acordo asumido por unanimidade no Parlamento de Galicia, materializado no Plan de Normalización Lingüística do ano 2004, remarcaba claramente a necesidade de establecer políticas de impulso do Galego para espallar o uso da nosa lingua en todos os ámbitos da vida pública e privada de Galicia e en todas as franxas de idade. Mais este “consenso lingüístico” foi mudado por un brusco cambio de rumbo na política lingüística de Galicia definido por un novo modelo como “bilingüismo harmónico” que, tal e como indica o seu nome, parte da falaz existencia dun problema de convivencia entre os falantes das dúas linguas oficiais de Galicia.

Un renxendo teórico, o “bilingüismo harmónico”, co que se pretende agochar unha realidade sociolingüísticamente contrastada como é a existencia dunha lingua dominante, o castelán, sobre outra dominada e minorizada, o galego, que en consecuencia precisa de políticas diferenciadas e compensadoras.

Os resultados deste novo enfoque concréntanse nun proceso de substitución da Lingua Galega pola castelá nun escenario no que as franxas de idades inferiores, non van ser quen de garantir o relevo interxeracional no uso do galego. Por este motivo resulta urxente activar mecanismos que permitan revertir esta tendencia en vías de consolidarse.

A ninguén se lle pode escapar o papel fundamental que a escola ten na adquisición, desenvolvemento e divulgación dunha lingua. Por este motivo tende a considerarse como un dos principais axentes de normalización dun país e, polo tanto, a responsable de asentar e incorporar o galego como lingua de uso dos máis novos. Pola contra a aprobación do Decreto do Plurilingüismo no ensino non universitario contrastouse como un axente desgaleguizador de primeira magnitude.

Cómpre pois, nunha situación de emerxencia como a actual, partir do consenso previamente existente para avanzar nunha política lingüística eficaz na defensa, pulo e normalización do galego. O interese xeral na defensa da nosa lingua debe impoñerse hoxe se non queremos que esta sexa un simple recordo etnográfico no futuro.

Por estes motivos o Grupo Parlamentar da Alternativa Galega de Esquerda, presenta a seguinte Proposición non de lei para o seu debate en Pleno:

O Parlamento de Galicia acorda, cumpridos os trámites regulamentarios pertinentes, crear unha **comisión de estudo parlamentar** na que poidan participar diferentes institucións, organismos, colectivos e axentes para realizar un axustado diagnóstico da situación actual da Lingua Galega e deseñar actuacións dirixidas a facer efectivo e avanzar no Plan de Normalización Lingüística aprobado por unanimidade no Parlamento de Galicia no ano 2004.

Santiago de Compostela, 25 de marzo de 2015.

Asdo.: Ramón Vázquez Díaz

Xabier Ron Fernández

Yolanda Díaz Pérez

Deputados e Portavoz s. do G.P. da AGE.

Asinado dixitalmente por:

Ramón Vázquez Díaz na data 25/03/2015 18:20:57

Jose Javier Ron Fernandez na data 25/03/2015 18:21:08



Yolanda Díaz Pérez na data 25/03/2015 18:21:19